




Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC | THUSO

So482

Kum 56 Ihinna

Lhamul/July 2019



AUGUST EVENTS

Damtheina

Shalom Theological Seminary - 11

Kangui Christian College - 18

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



**EMI (Engineering Ministries International, Delhi) akan
Mr. David & Mr. Austin in 15th June 2019 nikhon KBC Office
mun ahung vil lhon in ahi.**



**Christa Lenggam a tong khom ding in India Collaboration
(Kolkata) akan in Mr. Subhasis in KBC vilna 27th may 2019
nikhon ahung nei tai.**



**1 Day Women Seminar cum KBC Women Work Committee Tour
Songjang Baptist Church, No. 6 18th May 2019**

CONTENTS

THUMAKAI HO

1. Editorial/ Christian Natoh	1
2. An thah Ga masa/Rev. Thangsats Kipgen	3
3. Half Christian / Rev. Lamkeng Lhouvum	6
4. Pathen houna a milham /Rev. Henjalen Doungei	10
5. Mission Column	13
6. Men Column	15
7. Women Column	16
8. Youth Column	19
9. Literature Column	22
10. Education Column	24
11. STS Column	25
12. Report	26-31

EDITORIAL BOARD

<i>Chairman</i>	: Rev. Tonglet Haokip, President KBC
<i>Editor</i>	: Dr. M. Thongkhosei Haokip, General Secretary
<i>Joint Editor</i>	: Rev. Henjalen Doungei
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“Christian Natoh”

Editorial

Hiche jeh a chu keihon lungsetna kachan uva hiche lhachaa panna kaneiyuhi keiho kalhadah hih hel ui. (2 Corinth 4:1).

Thilpha bolna lamah chimtih neilouvin umuhite, il-hahdah louvu le aphatcha ilo ding uhi. (Galatia 6:9).

Thumakai:

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tulha thupi chu “Christian natoh” ahi toh kilhonin, i houbung leh lhangpi hinkhoa sahphat ding tampi lah a Christian te natoh hi jong poimo tah khat in kagelin ahi. Hiche article ah hin Kuki Christian te lah a Christian natoh thudola iki houlim diu kahn deisah e.

Mikhat in pahcha namtwi khat amin Rose kiti thudol aseina ah, amel ahoiyin, anam atuiyin ahin aling (thorns) aneiye atin, lung phamo tah in aume. Ahin, midang khat in lamdang taha avetna ah hitihin

aseiyin, ling (thorns) joh chun rose (pahcha)
aneixe atin lunglhai tah in ahin seiye.

Hiche teni vetdan/mudan chom chom hi
imu tauve. Ahileh, tulai Pathen na itohnauva
adeh a KBC sunga member kimkhat in, KBC
ah don le kai atambah seh e atin houbung
danga kichon loi jong iumun, kimkhat chun
iphunpiuvin ahi. Alang khat a chu system
le policy phalou/dihlou jong hikha maithei
ahin, semphat ngai jong minte. Ahin, ihet
diuva dei um chu, iha tona/panna channa hi
khonunga itohga a panga, lallukhuh hiding
ahi ti sumil poute. Tunia hitia genthei tah a
ipan nauhin khonunga eima a dinga tohga
tamchek jo ahin, ihato lou/panlou hi tutua
anuom tobang ahivanga ikhonunga dinga
san ding kinei lou ding joh hipontem? Labu
(Pss.126:5,6) in aseina ah, mitlhi pum puma
muchi tuten kipah tah a aga akilo ding
ahi'ati.

Solchah Paul in, Corinth mite henga 'hiche
jeh a chu keihon lungsetna kachan uva hiche
lhachaa panna kaneiyuhi keiho kalhadah
hih hel ui' atie. Chule, Galatia mite hengah
chun 'thilpha bolna lamah chimtih neilou-
vin umuhite, ilhahdah louvu le aphatcha
ilo ding uhi'atie. Hiejeh chun, tunin oubung
mite hon jong ito tamna chaan uva isan ding
atam e ti ihet u toh kilhona, lhasam louva
thanom tah a Pathen lenggam natohna jom
jing ding in ikitiem cheh uve.

Lunglut tah a sim jouse chung a Pathen van-
geph chang taken.

"ANTHAH/GA MASA KUT"

Host Country: China.

Exodus 23:14-19



*Rev. Thangsat Kipgen,
Pastor KBC Centre Church, Langol.*

SERMON

Amasan Houbung mite chule KBC Thuso anasim, adeh a Anthah/Ga-masa Kut article anasim jouse nabon chaovin Pakai Jesu minnin Ga masa Kut chibai kahin peove.

Pathen sem kumle lha nikho acheche in hahsat nale genthei na go le daitwi nohna hetman lou khopmin October, 2019 lha a hi Pakai lengam KBC a natoh na a kona kichol ding kahi tan, KBC General Secretary in Lhadou (June) 11 KBC Workers Prayer Fellowship a thusei na eihin pen hiche a kageldoh khat le katahsan khat chu apension ding tah jeh in thusei na ngailut tah a einapeh hint e tia keiman jong phat

kana mangin loite ho tilkhouna le achainan lhahna thu kasei jin ahi. Tuchunga KBC Thuso a mopohna neihon Article Anthah lop kut thua jih dinga eihin sei u jong hi existing worker ahi retired ding kon chet a achaina a kakam-

cheng thu kija hen tia eihin tie-mu hi kipah tah in kasangin, keija dinga jong achaina KBC Thuso a kajih hidingin kakigelin kiboi lleh hen lang hi jong leh hiche article hi mol mo tah hijongle kahin jih in ahi. KBC Thuso kihet

to na le Pathen thusei na ineinao hi mangchan Houbung mite ho jouse acheding kahi tah jeh in damsellun lang, tohna hihen lang to na hijong leh kilung khat tah a pang khom jinga chule KBC Thu-so kihet tona Pathen thu lhang-sap na hi machal sah jinguhui te. Houbung mite jouse SAJONARA.. Tunia ithu mun nu chung a kipe Bible chang hi ivetna ahileh ito banga Ga masa/Anthah kut ki-mang ham ti seilouva isimu leh ihetsoh tah diu ahin, ipi hijong leh akiman dan itobanga midang hon jong amanu ham chom chan veohite. Bible ivetna ahileh nikho loupai Kut tampi imu uvin hinla Tahsan chate eihon abon chan ina mang pou vin hinla hiche lah a Christian te a dinga poimo ho ina man naovah ANTHAH LHUN/GA MASA KUT jong hi athupi loikhat, Pathen thangvah na khat ahijeh in hiche hi ihin mang toupeh un ahi. Mihem min muchi chivo leiset na kitu lut hi ahung hindoh a ahung Gaso doh thei na ding, leiset a kona keh-doh chun aga aso doh na dinga Pathen nin phatthei aboh a kon ahijeh in lamchom chomin ihin mang toupeh un kipa aumleheh jengin ahi.

Muchi kitu lut na ding le natoh: Israel te hi Egypt, Pharaoh leng-vai hopna noiya gentheitah in hinkho ana manguvin ana kanao awgin Pathen nin anajah a konin ahuhdoh dingin Mose ana mang-gchan Pului Abraham toh akitep-

na geldoh thah in Gamtepgam khoiju le bongnoi lona Canaan gam thanop umtah gam ana jo-nun, hinla alhun masangu alam jot u Kum 40 sungin muchi chivo atu pouvin Anthah amaho tahsa tah a lhoso ana nekha pouvin, Pathen nin Manna vanna konin ana pen anavah in ahi. Ajotnao Gam alhunna amaho a konin muchi chivo kitu na ding mun le mol akisemun kisa lel tah in asemun hiche a muchi atu uvin ,muchu kitu jeng jong chu asu se ding jucha, vacha ganhing tam tah lah a kon nin ana veng ngun ahi. Ipu ipa teovin jong muchi kitu ho chu lung thim lut tah in ana vengun ana huh doh un, tu-lai jin vang hiche natoh venbit na dingin Green House ti mihon ana mang chaovin ahi. Ahung kedoh jou geijin jong asa sah un lou bol vaicha genthei ten aga lhun kal ngah lel tah in ana um jingun itih le aga akimun gentheina ho hi abaang tadem tin kinem tah in phat le nikho angah un ahi.

Muchi kitu lut le Aga: Exodus 23:16 ivet na ahileh Lou laiya muchi natu nalhosoh alhung masa pen dinga chu Kut nabol ding ahi. Hiche a thucheng Kut ti kiman na hi alhangpia ivetna ahileh Ga masa muthei jeh a kipa thuseina Pathen thangvah nikho a man ding hijeng ding ahi. Loubol miten leiset a muchi kitu aga ahung lhun na kipana sangtah akinei/inei jun ahi. Ajeh chu neh hahsat kella tah a Kolbu

Butun, Changmai, Mai alhun hin, insunga minu mipa ten kum kigal kai thei tan te ti kinepna le thanopna aneijun hiche a konin lung thim kicholdo na aneijun ahi. Hiche Anthah kimu nia geldoh thei le kipana tah chu Pathen nin leiset phatthei aboh a muchi chivo Ga aso sah a eipeh phatthei na sangtah ichanu ahi ti sumil louva aga choija Maicham ma kipa thu sei dinghi ahi.

KBC Events a Anthah Kut ti Houbung miten imang ngun Thing lhang nga chu hon le lou ineijun hinla Phaitol, govt. Quarter a cheng hon amun le amol neilou hon jong umthei lou na tampi aumin hinla bazaar la icheovin gathah ho item chom chom ichouvin Pathen maicham ma kipah tah in ipolut un ahi. Hitia lou neilou hon jong ibol lu hi ivetna ahileh Pathen nin leiset phatthei abohna a konin muchi chivon ga aso doh tai ti phondoh na le Pathen thangvah na nikhoa iman nu ahin, kipa aum thou thou vin ahi. Hiche nikho a kipa umtah khat chu Ga tamtah ichoi uva ineh khom mu va ikipao hi thanop umtah ahi.

2005 kuma Asian Rural Institute Japan na kaum lai jin Anthah lhun kipa na akimangin hiche nikhon Africa gam lang mi Nupi training nga pangho khat in beng sunga Gamasa item chom chom ahin pon ama gam mi von na ahung kivonnin kikhop na sunga

ahung lut nin la ahin san ahung lam lhung keijin ahi. Hiche chu ivetna ahileh lung thim nasa tah in atong khan ahin, ajeh chu Pathen nin phatthei aboh na a kona hung doh ahin Pathen thangvah na a pohlut ding ahi ti chu kichen tah in akimu theijin ahi. Abang kipah thanom tah in group in khong beng ngin lam pumin ahung lut nun gamasa ahin polut nun ahi.

Ga Thah Pathen Thangvahna:

Israeel te Egypt gamsunga kona ahung pot uva khoiju le bongnoi lon na gam alhun nuva alhosoh u Ga masa amuteng ngu leh hitia aboldiu ase diuvin hetsahna ana neijun ahi. Pathen nin lhohoh ga namu teng Pathen henga nanging neipeh u kahin choi lut tai tia nasei a thangvah na neiding tin ana sei peh in ahi. Kut iti teng kipa nikho ahin, hiche kipa nikho a hi Israel ten thanom tah a kipah tah a Pathen thangvah na apeh bangu va eihon jong Pathen nin eithil peh nao ama houna a Maicham ma choi lut a kipah tah a eipe pao chung a kipa thu sei ding hi isuh mil lou diu ahi. Hiche keo jong chu hilou vin Pathen nin phatthei eiboh nao sum le pai muthei na adang dang ho hi Pathen eipe pao ihouna inei diu ahi. Hungu vin Pathen nin leiset le muchi phatthei aboh a Gamasa eimu sah u kipa thu sei ju tin Ama Thangvah na peohite. Pathen nin asim jouse phatthei boh taken.

Half Christian

(Mark 4:1-9)

*Rev Lamkeng Lhouvum
Pastor KBC C/C Kangpokpi*

Sermon

Thumakai:

Tulai Christian hinkho iven ahileh Half Gospel ahilouleh half Christian ti thei ding atam lheh jengtan ahi. Anu gil sung'a ahung pen nia Hou in na kipui nia Hou in kai, aji nei nikho a houin kai chuleh Athi nikho'a Pathen min'a kivui mai mai Christian tampi aumtai.

Abang kim khat te chu seasonal Christian ti ding umkit nalaijin ahi. Nikho danga Houin kikhom ngailou Christmas nikho ham, Good Friday, Easter Sunday nikho ahilou leh Mother's day nikho ho bou kikhom jong aumin ahi. Tulai alhangpi in North East India gam'a khangthah houin kikhom akikhol na a chun Nagaland Lotha Tribe Youth ho chu Houin kai 63% ahi. Mizoram chu alhang pi in 90% akikhom in ahi. Ahin amah o chu Lhagaolam poh nat na jeh'a kikhom lhom ma ahitan, ahin Christian khat kahi jeh in kikhom Houin kai inge ti atamjo ahitai. Amaho tobang chu Cultural Christian tin aheuv in ahi.

Ipi ding'a Christian sakho hi hibang'a lhadai kigo gam hitam? Lasempan kalasah jong phat chom na bei haldoh na umdeh lou nopla jong kasa chim jitai kiti tobang tampi aki umdoh jin ahi. Paul chun "Pathen ngaisah lhem-na athahat thil bol theina janom lou hicheng chu hung umding ahi" (2 Timo 3:5) ati ho chu ahung guilhung pan tan ahi. Aseinom chu Pathen thu chu lungvul na chu aneijun ahin, athahat na pom nom lou ho aseina ahi. Amaho chun alim (gospel picture) chu

adeijun athahatna apom nom pouve. Pathen thahatna amah o a alut ding deilouvin alim bou chu adeijun, hiche ho chun chon-set chu anung sun jou jilou u ahi. Pathen thahat na a chun kibol jou tah tah hen lang hileh tulai Christian hinkho hi lamdang ding ahi. Hinkho hi kikhelna (Change) hilouva alimchom (Transformation) hiding angaije.

1. Half Christian ho chu itobang ho aham?
Chunga Bible chang sung'a hin

Pakai Jesun muchi Thepa thulem aseï na a hin thil thum veo hite.

Lung chang tah: vs 4

Chuin ahitin ahi; athe athe leh abang lamsih'a achun ahileh va- chaten ahung loh gamji taovce. (Mk 4:4) . Lamsih lang chu ati hin ipi avetsah ham ? Lungchang tah avetsah in ahi. Song lungchang nei ho kiseina ahi. Bakht Singh Evangelist pan, ka in maija song khat kakoijin jingkah katho seh leh good morning my stone katin kasop ngimseh jin kachul ngim jin ahi. Nilhah kahung lhun teng jong leh good evening my stone katin ka houjing jin ahi. Ahivang in khat veicha jong henge sir ei ti khapoi. Song chu lung chang nei lou atah ahijeh'a adonbut thei lou ahi.

Mihem alung chang tah kiti chu itobang ahitadem? 1988-1989 Manipur Theological College , Kangpokpi Bible kasim laijin nilhah khat Hospital'a adam lou tao peh din kachen ahi. Eimi Nun- gah khat hepa, hepa tin ahung kapin ahi. Ken jong koi ham tin kadelut'a ahileh eimu phat in kapa aumtapoi tin akap tan ahi. Hiche mithipa longdamsa chu boi pi thei chanin kaboipin jan 12.00 midnight don hin alongda- msa chu Saktiman khat a kaloipa toh akho geijin kaga thah Ihonin ahi. Gari a kon'a alongdamsa ka- dop lhah a kon chun aji achate , asopi u lenao te chu aha ka lleh jengun ahi. Houbung mi tamtah tah chun inmu'a ei na ngahun

ahi. Ahin lungdon umtah khat chu Houbung lamkai ho koima cha ei vailhun diu aumpoi. Insung mi ho aha ka behseh jeh un, kei- man tao na khat kamangin chuin kaloipan jong tao na khat amang kit in ahi. Hinlah insung mi ho kana chu atang deh tapon ahi. Kei jong kalung adong thim tan kavet le leh Head Deacon pu chu kamun, Hepa ipi ding'a Houbung lamkai hon nei vai lhun lou ham katin ahi. Aman, hiche mipa hi Houbung sung'a vetna (Church Discipline) aumkal kum 15 ahi- tai. Adamo Hospital a Houbung lamkai ho kachevin nalup na jalkhun chung hijong leh Pa- then leh Houbung mite ang'a nathemo naho ngaidam thumin chuti leh vet'a na um na a kon'a kalah lut ding nahiuev katiu leh anompon, tunia hi Houbung in pan kalah thei lou u ahitai ati. Leisetna kipasal sah lleh jong leh tonsot meidil'a vang minute 5 jong kipasal sah jou lou di ahitai.

Mihem khat chun chonset ahi- nbol bol teng leh imacha selou- na lung thim hung lut'a alung chang tahden ji atame. Thih kheng pa chu nikhat akom'a aui -cha akol'in a thih khen chu ahi- nkhet leh Ui-cha chu akichan alhaimang tan ahi. Ahin nikho ahung che che leh Thih kheng- pan thih kheng jong leh Ui-cha chu apu kom'a nom tah in a-ihmu thei tan ahi. Hibang chun chon- set jong ibol bol le angaina ki umji , imacha phamo sahna kigel

jilou ahitai. Nehguh chah guh jong angaidan'a um'a ane gu thei lou ho chu angol dan'a umji ahitai. Tulai thu kisei khat chu Ju joh Nupi hon jong achanu (Amahpa) jipa dingin Judon ho adeipo akiti.

Lamsih chu mihem vah le ho leh gancha vahle hon achung achot chot nu ahijeh in, aleiset chu atahden ahitai. Hijeh a chu muchi kithe lamsih'a chu ho chu leiset a chu lut thei louva , vachaten ahung nehchaijiu ahitai. Pathen thu asan ding dol'a sang thei lou ho chu milungtah, lamsih lang'a chu hotoh kite kah ahi.

B) Kipah loichal hinna nei lou:

Chuleh abang leipatna achun ahileh alei asalou jeh in akeh loi jengin, ahin nisa ahung so teng leh asang gon jung nei lou Ahijeh in agop jitai. (Mk 4:5-6)

Camp ahilou leh Evangelist campaign kibol teng leh amitlhi toh anap tui toh kai hen hun'a ahivang'a hiche ho akichai teng leh abol ngai ngai nung bol kit, ache na ngaija che kit ho chu song lheu chung'a chu ho ahitai. Kipah loi chal jung kho na aum lou jeh a ding det jou lou jong chu half Christian ti thei hi lou ding ham? Judas Iscariot chu van gam alut dem? Ahi lou leh apenthah na chu amang the idem ? Pathen thusei khat in Judas Iscariot chun apenthah chu mansah theipon te, hijong leh damun meidil'a lut thou thou ding

ahi. Ajeh chu ama mi peng thah lou ahi. Peng thah lou ahijeh'a mansah ding jong aneipoi ati. Kipa loichal chun apenthah sah ahipon, hichu imotional natoh bou ahin, alungsung'a songtum lentah muchi daltan'a umpa chu kaldoh ngaiji a ahi. Achuti lou leh jungkho thutah chu um thei ji lou ahitai. Amah o chu leipat'a chu ho ahi.

C) Deichat tamval

Chuleh abang Ling lah'a achun aling chu ahung khangin adep lih tan aga him him aumtapoi. (Mk 4:7) Itobang ho chu ling lah'a chu ho ahitadem? Pathen thu jong dei leiset thu jong dei . Deilhen atam valjeh'a khang thei lou tampi aume. Lou kaipa chun ling ho jong akai doh jin ahin hichu akibodoh pai lou jeh in ahung pou-doh kit in, muchi chutoh ahung hing khomin chuleh adep lih jitai.

Aling chu ajung tampi aumpoi, hinlah ahung khangloi chaljin ahi. Ling kikal doh kipai doh pai lou ahung kangletna muchi adep lih ji bangin, Christian hinkho a chonset neocha ahi nati'a ahinlah paidoh pai louva nakoi leh hiche chonset chu nahinkho a hunga doh'a nachon phat na jouse chu adep lih ji ahitai.

Ipding'a Lot chu Sadom khopi chu vahlut kha ham? Bible chun ol-ollin akichon nai naijin akhon na in Sadom khopi lhung'a ahitai. Chonset chun adeplih joh dan

ahitai. Tunia jong deilhen tam-val jeh'a atheng lou, aboh tampi jong aboh'a kikoi thei talou, Avom jong akang ahi kiti gamta hiche chondan hi Half Christian ho chondan ahitai.

2. Total Christian:

Chuin adang ho chu lei pha laiya achun akhangin ahung pungin agatai. Ajat som thum cheng , som gup cheng , jakhat cheng apung tan ahi. (Mk 4:8)

Half Christian itiu leh Total Christian jong umding ahi. Apumpia Christian ahilouleh Christian dihtah ho chu Pakai Jesun, Kathu pom'a, kaseibang'a juinding go a , atah beh a tongdoh pa chu ahi. Tunia Pathen ija bol'a asei thua chon'a, Ama kisan lut'a ga sosah ho chu Total Christian akitin ahi. Ahinkho a Pakai juitah beh'a thipi ding jong kicha lou ho chu ahive.

Israel mi Edward Richman mihaosatah khat Israel miten angai sang ma ma khat 2017 lam chun a thitan ahi. Athiding kon in achate le aji akouvin Enveloped ni apen ahi. Enveloped apeh teni chu khat hi ka thi jou jou leh nahin sim ding chuleh khat pen hi kathi jou ni 30 jouleh nahin sim

diu ahi ati.

Hiti chu ama pa hi ahung thitan ahi. Alekha khat chu asimun ahileh kadei pen pen keng moja neihin bupeh un atin ahi. Insung miten jong hiche hi adeipen chu hinte atiuvin abu peh got nu leh Rabbi pa chu anom tapon ahi. Tao na kiman khum'a kichun tup ahitan along chu natham thei tah lou diu ahi atipeh tan ahi. Rabbi chun Pakai kom lhung'a ahitan Moja bu angai tapoi tin moja chu abupeh tapouve.

Akivui jou ni 30 thum jouvin a lekha khat chu avet kit uva ahileh hiti hin akisune. Aw kathi ni chu kakeng moja jong nei busah tapouve. Keima mihaosa tah Billoner kahia ahin kathi nikhoa kakeng moja jong nei bu peh thei louvu ahileh kanei kagou ho chu napha toh nan hi mang taovin, keng moja sethei ho ana choh peh taovin tin ana jih in ahi.

Thuchaina:

Pathen in total Christian hidin ei kouvun ahi. Pathen a dia dang chah tah tah hina nanei leh Pakai Christa Cross a kadang achah e ti pa chun dang nouna kidang tah napeh ding ahi. Asim jouse Pathen in phat thei boh taken.

Pathen houna a milham panmun poimo dan.

Acts 2:1-13

*Rev Henjalen Doungel
Mission Secretary*

Sermon

Introduction:

Tulai jin aching athem chule hetna le bolthi na neihon bou Pathen na atoh dingdana gel loi akiume. Chutia chu Pathen thu hetgilna neihon bou atohding leh Pathen lungnachim nakham in atong doh mong nadiu vem? Bible kijih lai hin clergy hole leity ho kibah lou na kicheh in anakijih poi. Barnabas hi milham Pathen tahsan tah khat anahi. Milham ahina a atohdoh hi houbung thusim a mangtalou ahin. Seijui 12 kilheng doh ho bang banga Pathen na dinga na anatoh chom cha anave khom u hite.

I. Michonpha ahijeha lolhing ahi.

Pathen natoh na a chonphat kiti jong hi poimo tah ahi. Lungset mana Tahsan vang a huh hinga umding hijong lehen michonpha lou chun Pathen katah sane ati jing chu hetthem hahsa tah ahi. Mihem khat chu achih jehle athep jeha chonphat na lama a lolhing jong ahideh poi, Chonphat hi Pathen ngaidam chang sa kahi ti hetthem na a kon hung soh doh hina khat ahi. Hiche hin Mihem khat chu Christian hinkho hoitah aman sah ji ahi.

Chonphat na kiti hi mipha ho hinkho a kon in jong akilason thei je. Seijui hon chonphat na hinkho anaman jou naochu atahsan pao

Jesu umchan a kon alah sonu ahi.

II. Barnabas chu lhagao va kon ngailut themna chang ahi.

Pathen a kon hongphal tah a ngaidam chang ahi akiheth jalla amanjong a houbung dia hongphal tah a anei agou apeh jou ahi.

A) Jerusalem houbung a din it louhellin apen, agam leiset ajoh in sum chu solchah ho khuta apei. (Acts 4:37) Hiche athilpha bol hi Pakai lhagao aneijeh ahi. Ajeh chu amahi tahsan nale Pakai lhagao dimset ahi. Tulaia houbung avai-chai itiji houhi Pakai tahsan na a ikingap nao apilhin lou jeh uva hung kipan ngen ahi. Lhagao ngailut na um na a mipin thanom tah in Pathen a din apejin, hita-

bang mi tamna chu houbung neocha hijong leh vaicha ngai lou ding ahi.

B) Apat it louvin Pathen a din apei. Pathen hou ahung tamcheh a houbung ahung puncheh cheh chun Barnabas panlah dan hi vet-ton thei tah ahi. Antioch a tahsan thah ho sudet din achen, ahung pilhina houbung phuding ahi- phat in aman Pathen houlam to kisai ja lamkai a amu Solchah Paul Tursus khopi a agahol doh in ahi. Gentile atahsan ho Judah kisah ding thu a boina ho aboipin phat lut tah in alhai pin ahi. Houbung chu asunga hongphal taha kipe doh jeng mikhat le nibeh aum-lou leh machal ngailou ahi. Hichu Barnabas hin anabol ahi.

C) Ama Pathen a din akipe doh e. Abol thei na, athanei na chule alungthim abon chan Pathen adin anape doh e.

Chuti chun letding gel louvin kineosah tah in Pathen thu ahil lhanglen minphat chan nadin abol poi. Pathen hina hongsung a mihem khat chu ahin pulut ding bou chu aboi pin thildang anaboi pi poi.

III. Midang Leadership Quality neiho hetpeh na aneije.

Mi thilbol thei na ho chu nangin Pathen natah sana chule midang tahsana nanei lou sen hedoh thei pon nate. Pathen mi dihtah ahijeh in Barnabas chun midang Pathen

in thilbolthei na apeh ho chu an-ahe them in ahi.

A) Paul: Paul chu Pathen in ahin kouva anatong dinga Damascus khopam a ahin kimusah jouva patin Jesu chu Pathen chapa tah beh ahi ti atah san tan ahi. Ahin-lah tahsan na hong sunga a hung lut a seijui ho toh Pathen na tohk-hom ding ahin ti hin seijui hon anatah san pouve (Sol 9:26-28) Ahin lah Barnabas in Paul kikou na chu anahechen in Pathen in nasatah a ahin manchah ding jong ahen hijeh chun seijui ho laha Paul jong ahung lut thei na-ding tohgon ananei jin ahi.

B) John Mark: Pathen natoh na a Paul kithopi dinga Mark che chu Barnabas tohgon anahi. Mark in Pega khoa Paul chu anadalhan ahileh Paul chun nasa tah in Mark chu anatah san tapon ahi. Hijeh chun aman a Missionary journey anivei chana a Mark chu anapui nom tapoi. Hinlah khonung in Mark hi Paul in tahsan tahleh ngaichat khoh pen khat nin ahin neikit e ti akimui. Hiche hin avet-sah chu Barnabas hin Pathen a kon khonung a hung lhung ding Pathen mimanchah ho hi kicheh tah a muthei na ananei je ti ahi.

IV. Athudih nachun dindet na apen ahi.

Barnabas hi Pathen a dia adih ahi tia apom khat chu kicheh tah a pom mi ahi. Hijeh chun

aman tohgon kigel lhah na kaht anei chu adihmo aumji poi.Tuni Christian ho jong dinmun kicheh neilou ho hi koima tahsan achang poi.Pathen in jong mihem te hi atahsan na a kicheh din eidei uve. Thudih a din hin thildih mudoh thei na le hetthem thei na jong eipeovin ahi.

V.Christa a kineosah ahi.

Mihem te hin alhangpin supporting role hi akidei pon ahi.Thepna ima neilou hijong lehen Main role lahding hi mijouse dei ahi.Hinlah Pathena dihtah a kingai Barnabas vang hi achungnung pen le ahepen hisangin mikithopile panpilang joh in a Pathen hetna ahi anamang chan ahi.

Antioch a lhgao mang thai ho holdoh din achen Pathen thu ngailut na neitah in agahil lhang in tahsan cha ahung kibe a mihem ahung tam phat houbung tundoh thei ahung hipaht in achen Solchah Paul Tursus a agahol doh in amajoh houbung chu atun doh sah in ahi.Hitabang taha kineosah leh Pathen a dinga lung thim thengtah lamkai ho hi jana chang dinga lom ahin Pathen in jong hitia kineo sah atahsan chate hi ana lentah tong dia adei ahi.

Tunin Pathen thusei themtah leh

hetnagil tah nei houlamkai chu ingaichao ve.Ahin lay leader Barnabas tabang Pathen gingho panlah na louvin thil lentah Pathen a din kibol doh jou ponte.Bible a hin Peter John,Paul, chule adang dang hohin munlentang leh min lentah aneicheh un ahin Barnabas the layman pa hi munlentang akipe poi.Hinlah ama anaumlou hileh solchah Paul jong seijui ho laha anajao thei lou maithei ahi. Amahin Paul hi dihtah a Pathen in akouna le manchah ding a agon ahihi ahетthem in hijeha chu adinpia seijuiho toh ahin tohk-hom sah ahi.Khonung a hichana hi New Testament kijih na a munlentang ahin neikhah ahi.


Tunin Layman tahsan na lama monpi umtah ho,Nang ho jong Barnabas banga koima seiphat le hetpeh lou va houbung khandou nading le Pathen gam natoh machal nading a pan lajing chu nahiue.Thaset nathei leh lunglah dah nathei tampi tohjong leochun Pathen natong lenpen khat nahi geldoh pumin hatah in pan hinlan.Lunglhadah louva ajochana pan nalah leh Pathen nin nasan ding kipa man gotsa akoi aume.

Asim jouse Pathen in phat thei boh cheh taken.

Mission Column

Engineering Ministries International (EMI) ten office vilna hung nei.

Achesa nikho 17th June 2019 nichun Engineering Ministries International (EMI) lamkai ni England a kon Mr David le Florida America a kon Mr Austin chu Mr Hethong Edify lamkai nain KBC office vilna ahung nei un ahi. Hiche Foreign gama kon Engineer hohin atheptnao le achihnao



Pathen natoh na a aman chah u ahi. Vannoi leiset muntampi a amaho kingaichat na jouse a Engineering work abol uva Pathen na atoh u ahi. Pathen in pha asah leh EMI te tohin KBC kihet them to na neija Convention natoh ho tohkhom ding deisah na akinei jin KBC Council in pha asah leh nikhat leh ihin toh khom dingu jong kinep na akinei je. Hitabang lungel kinei ahitoh kilhonin New Office Building, Elijah Prayer Mount chule Lom Resource Centre vetpi na akinei jin ahi. Chunga kipe mun ho hi amaho Plan layout design hoisella bolsah a amaho lamkai na noija construction work ho chepiding deisah na akinei jin ahi.

Taona ngaichat le kipa thuseina

1. Rev. Jeteen Gajmer, Supervisor Nepali Mission Field.

Christa jallin ani, anin, alha, alhan, akum, akum in lhagao mangthai dingho huhdoh nale puilutna ineibejing uvin hijehchun Pathen thangvah in umtahn. Tu lhasung chun Nepali field a sopi Hindu Sakho akonin mili(4) in Jesu Christa chu thildang jouse nung jui-sang a amanung juinding le akin bolding a akigellhah utoh lhonin Rev. Jeteen Gajmer khut ah Baptize achang taove.

Amaho chu: 1. Perrusam 2. Bisnumang 3. Tara 4. Dal Bahadur Tamang. Amaho chenghi adindet thei jing nadiuvin taokop ute.

2. Evan, Dik Bahadur, Kanglatombi Mission Field.

Kanglatombi field akonin jong Hindu Sakho akonin mili (4)mama Jesu chu ahuhhingpu le a Pakai din akisan utoh lhonin Baptize achang kit-taove. Amaho chu: 1.Phurki Maja Tamang. 2.Malaki Battarai. 3.Sa-lomi Urang 4.Mani Ghesing.Amaho jong taokop kit ute.

3. Evan, Bijay Ghatani, Chingmeirong Mission Field.

Chingmeirong Mission Field tehin tule tua aboipi pen uhi Pakai Houinn sahдох teiding tihi plan anei uvin,sumle pai lam a hahsatna chomchom aneijeh uvin,Pakai Houinn sahдох thei a aum nading in Houbung miten taokop kit ute.

4. Rev,Ibomcha Singh, Supervisor Meitei field.

Tutua phaisung hihen thinglhang hijong leh sopi meilhei ten ahaboipi pen uhi Zakai Ministry hi ahi.Achesa June 8th 2019 nikho jongchun Taobungkhok mun ah mi 170 pannan Zakai Ministry hi ananei uvin,lolhing tah a chaitheija aumjeh in kipathu sangtah in akiseijin,hiche kin a sumle pai neile gouva panla hojouse Pathen in Phatthei naboh cheh taohen.

4. Mr. Haopu Haokip, Mission Assist, KBC.

KBC in tule tua Mission fiel hi Pathen mapuina jallin munchom chom a akineitan, Foreign,India gamsung, chule Manipur gamsung Nepali Field hihen lang, Meitei field chule Kuki Area hijong leh lhaseh a Missionary hoa kon a report kimudung jui in Houbung miten Pakai leng-na itohnao amachal jing e tithu akimun Pathen thangvah in umtachen. Chule KBC Missionary hole Evangelist ho chengcheng jong Prayer Partner ahijing uvin, tahsa le lhagao chule Family adampet u ahijong akimun, ponthotah in apangjing naove tithu akijan hijehchun muntin a um Houbung miten jong lpanhu natheipen u taonan kopjing uhite.

Men Column

MEN DEPARTMENT NATOH MACHAL JING

Kipa thu phon:

Pathen phat najalin achesa 16th June 2019 nin Houbung tin na PATE NIKHO nomtah in Emang cheh uvin, ahile pathen chu thangvah in umjing taken. Chule tahsa leh Lhagaova kisuh hal na programe jatchom chomma anopna thei chan na mang hihen lang iti lampang nga hijong leh amang ho jouse chung ngah kipa thu sang tah in sei jou lou ahung kiphong nge.

Keima jong Men Department secretary khat hina in centre church s.



salem sapormeina Houbung a nomtah in kaki mang khom uvin ahi. Pathen houkhom anom min chu le competition a pate lapi le adang dang jat chom chom jong abol uvin anom lleh in ahi. Pathen nin Houbung phatthei boh jing ta hen. Amen.

LOM RESOURCE CENTRE MUN NA NATONG DING NGAICHAT AHI JING TOH LHONNA NATONG NGA AHUNG KON HO:

Gambih no.3. Pate ho 3rd june 2019 nin mi tampi ahung kon thei uvin ahileh achung cheh uva kipa thu akiphong nge, pathen nin gambih no.3. Pate ho phatthei boh jing taken lang Gambih le Houbung a pate ho machal jing taohen.

Gambih no.4. Pate mitampi ahung kon uvin, najong lentah atong doh uve. Gambih le houbung a konna pan hungla Pate hojallin na lentah etong doh uvin, amaho jouse chung nga jong kipa thu ephong uve. Pathen nin phatthei boh jing tao hen. Pathen nin LOM RESOURCE CENTRE Phatthei boh jing taken. AMEN.

TEPNA LEH HETSAH:

Ahung lhung ding 5th july 2019 ni leh Forest Department Manipur toh gon na noiija mass plantation umding ahi in, hichu eiho Lom resource centre muna hi thingkeh (sapling) sangni (2000) phutheiding in aumin ahi hijeh chun Pathen natoh nale eiho Lom resource centre ngailut naleh khantou ding dei na jalin ahung pangthei chan hung pang ding in tepna toh tho a hetsah ahi e. Ahung ding hon TUPEH hin kipoh ding chule 9:30 am leh amun lhun cheh ding, 10 am chet leh natoh kipan ding ahi. Tomngai tah in pan hungla din avel vellin ahung kitem me.

Rev Kaikam chongloi, Secy. Men Department KBC.

Lydia vil ho chung a kipa thuseina:

C/C Sangaikot Deacon Board: Achesa nim 24th May, 2019 Friday nikho hin C/C Sangaikot Pastor pale atoh khompi Deacon Board hon Lydia vilna ahung neijun, tilkhouna le taopehna chule thilpeh toh thon ngailutna jallin Daal Kg 10, Ahlu 1bag ahinchoijun, achunguva kipa thu sangtah in kahin phonguve. Pathenin phat thei boh jing tao hen.



Pashong Baptist Church Deacon Board: Nisim 27th May, 2019 nikho hin Pashong Baptist Church, KBC Gambih No. 2 Deacon Board hon Lydia vilna ahung neijun, ngailut na jallin thil peh in Rs 2000/-



ahin pouvin, tilkhon nale taopeh na ahung neijun achunguva kipa thu seijou kahin phonguve Pathenin Deacon Board chule Houbung mipite jong phat thei boh jing tao hen.

Pangjang Baptist Church Deacon Board: Achesa nisim 12th June, 2019 nikho hin Pangjang Baptist Church, KBC Gambih No. 3 Deacon Board hon Lydia vilna ahung neijun, tilkhona le taopehna jong ane-



ijun, ngailut thilpeh in Rs 1000/- jong ahin peuvn, achunguva kipa thu sangtah in ahung kiseije. Pathenin Houbung mite jouse phat thei boh jing tao hen.

KBC Gambih No.11: Nisim 19th June, 2019 Wednesday nikho hin KBC Gambih No.11 Gambih Pastor Rev. Onkho Haokip le aloinu jaona Gambih Nute Lamkai hon Lydia vilna ahung neijun, tilkhon nale



taopeh na toh thon ngailut thilpeh in Rs 4000/- jong ahung peuvn achunguva kipa thu seijou lou ahung kiphonge. Pathenin malam a jong phat thei boh cheh tao hen.

Kipa thuphon



Gl. Lamkholun Haokip, C/C S. Kanan Veng in 2017 apat tuni chan geija Lydia mun'a umho dinga ngailut na jalla Daily News ho Eimi Times le Sangai Express Free of Cost a supply eibolpeh jallun achunga kipa thu sangtah in ahung kiseijin, Pathenin tu maban a jong alekha simna hihen atohna jousea phat theina thalhing set in pejing taken.

YOUTH CONNECT

3-8 October 2019, @ Khumanlampak Stadium

Kitetna Jouse Umdingdan:**Football (pasal)**

Gambih/Gamkai khatna Football team khat cheh pangding (20 persons)

- * Tutua youth member a pangho bou pangthei ding.
- * Form kisem ding, hichu phatah a alimtoh fill-up abol ma sat ding, submit nunga kikhel thei louding
- * Uniform lhingsetna akivondiu, achunga Gambih min pansah teiding
- * Koima chan midang (KBC/KBA hilou, gambih/gamkai dang) akilah thei louding

Volley Ball (numei)

- * Gambih/Gamkai khatna team khat cheh pang ding (12 persons)
- * Jinei kiti phot pang thei louding
- * Form kisem ding, hichu phatah a alimtoh fill-up abolmasat ding, submit nunga kikhel thei talou ding
- * Uniform lhingsetna akivon diu, achunga Gambih min pansah teiding
- * Koima chan midang (KBC/KBA hilou, gambih/gamkai dang) akilah thei louding

Tug of War (numei le pasal)

- * Gambih/Gamkai khat a mi 15 cheh pang thei ding
- * Amin apehlut masat ding, amaho bou pang tehi ding
- * Shot Put (numei le pasal)
- * Gambih/Gamkai khat a mi khat khat bou pang thei ding
- * Min apeh lut masat ding, Avella kikhel thei louding

Choir Kitetna

- * Choir member hi alhom pen a mi 25, atam penna mi 30 hiding
- * Uniform akivon cheh diu
- * Judges decision hi final hiding di

- * La hi 2 cheh asah diu, khat special number, khat kitetna hiding
- * Youth Connect Lapi umding, Choir jousen asahkhom diu.
- * Youth Day la jong kihil cheh a sah khomdi
- * Choreography/Melodrama
- * Uniform, dress code phatah aneidui
- * Mi 5 apat achunglang hithei
- * Khatvei cheh bou lamdiu
- * Gospel la bou hiding
- * Numei pasal kihal teiding
- * Judges ho decision hi final hijengdi
- * Race (numei le pasal)
- * Gambih khat a numei khat cheh
- * Gambih khat a pasal khat cheh
- * Vohthao Kinehtet (numei or pasal)
- * Gambih khat a mikhat, numei hile pasal hileh khohlou

Notes:

- * *Kitetna item hohi aphot dungjuiya kive ding ahi. Akibolman lou di ahikhah leh kahlhah thei, akibol mandi leh koibe dia kingaito ahi.*
- * *Youth Connect a pangjouse, kitetna item a pang hihen hihih jongleh koimacha akile umthei louding ahi.*
- * *Registration hi mikhat a Rs. 50/- ahi. Batch hoitah kisem ding, hichu Youth Connect a pangjousen aki-o teitei diu ahi.*

BIBLE QUEST 2019

ORGANISED BY KBC YOUTH DEPARTMENT

PORTIONS: EZEKIEL & DANIEL

LANGUAGE: THADOU-KUKI

EXAM CENTERS: ALL DISTRICTS

TYPE OF QUESTIONS: OBJECTIVE

DATE OF EXAM: 13 OCTOBER 2019, SUNDAY

PRIZES: TOP 1: Rs.15,000 + Memento

TOP 2: 10,000 + Memento

TOP 3: Rs. 7000 + Memento

TOP 4-10: Leather Cover Holy Bible + Memento

Notes:

*Koi Houbung mi hileh athanom jouse pangthei ahi.
Exam Center hi District jouse le Eimi umna India Khopi hoa kikoi ahijeh in
nabolna thei ding mun nakilhen thei ahi.*

*Application Form Rs. 30/- only napeh a na umna gamkaiya
nakilah nathei akioiye.*

Thuchen hetbe nomhon KBC Youth Secretary Contact thei ahi.
Contact No. +91-9402243389

YOUTH EMPLOYEES' DAY

14th July 2019, Sunday

KBC Houbung jousen KBC Youth member natohna neiho le natohna hinneibe atam nadin Gambih Pastor, Centre Church Pastor, Head Deacon jouse le hiche nikho a Speaker a pangdi jousen Pathen henga taona ina manpeh diuva temna le taona ahung ki-neiye. Offering vang umlou ding ahi.

YOUTH LEADERS' MEET

Pathen lungsetna jallin Youth Leader' Meet chu nisim 5 June 2019, Wednesday nikho chun KBC Centre Church New Lambulane, Gambih 1 mun'ah KBC Youth lamkai 180 vel panlah nan lolhingtah in ana kichaijin ahi. Hiche kingon a chun Rev. Boipu Serto, Youth Secretary, MBC in Leadership God's Way thupi mangchan Seminar class ana nei-jin chule Sopi Thomas, Singapore in jong Counsellor khat hinan tilkhouna thu chomkhat ana seijin ahi.



Hiche kin lolhin nadinga Pastor Seitinmang Vaiphei, KBC Centre Church pastor le atohkhompi B/Deacons jouse chungah kipathu sangtah akiphongin, chuleh Youth Department ten jong neh le chah phatah le kituptah in asem uvin, amaho jouse chungah kipana seijoulou akiphongin ahi.

Gambih 13, 14, 17, 18 tailou adangse ahungsoh keijun ahi. Youth lamkai hung kalsongho jouse chungah kipa thu akiseijin ahi.

Literature Column

Sunday School Teachers' Training - 2019 Munding

2020 kum'a Sunday School Teachers' Training munding thum in June 1-2 nikho chun Pangjang Baptist Church, KBC gambih No. 3 a Literature & Publication Committee Ihingset in aga kikal songin, Houbung lamkai ho le khosung haosa upa ho to kihou khom'na akineiyin ahile houbung lamkai ho, khosung haosa upa ho, chule houbung mipi ten jong Pakai leng-gam natoh'na'a pan lahk'na din Pakai min'in lung lentah keng'in nop'na eihin petauvin ahi. Hiche to kilhon'a hi khovei



(2020) KBC Sunday School Teachers' Training hi Pangjang Baptist Church, Saikul Area, KBC gambih No. 3 mun'a umding ahitai. Mun eihin phal

peh'uva chule June 2 (Sunday) nikho'a kipah tah le thanom tah'a Pa-then houkhom'na ho'a eikimanchah khompi'u Pangjang houbung lamkaoho, khosung haosa upa ho, chule houbung mipite jouse chung'a Pakai minin kipa thu sangtah in ahung kiphong'in ahi.

Literary Meet - 2019

Ahunglung ding 10th Aug. 2019 (2nd Saturday) ni le C/C, New Lambulane, Imphal mun'a Literature Meet umding ahitai, hiche nikho'a ding'a athempen/ asangpen mi/ group nga (top five) kilhen'na ding Item ho'a ding Pre-literary Meet hi July last week sung'a umding ahitai. Toh khompi gambih Pastor, ho, gambih lamkai ho le houbung lamkai hon inagel kho'uva, gambih level'a bolding Item ho chu July last week masanga inabol doh teidiuvin avel'in hetsah'na le tem'na ahung kinei kit in ahi. Tucharan geiyin gambih No 3 ten June 22 ni anabol tauvin, amaho chung'a kipa thu sang tah in iphonguve. Gambih dangho jousen jong anabol taleu hen pha'nte.

Convention Level

Sunday School Competitive Examination 2019

&

New Testament Scripture knowledge Competitive Examination -2019

Senior 1, Senior 2 le pilhing Convention Level Sunday School Competitive Examination - 2019 le Thulhun Thah Bible (New Testament) pumpi Scripture Knowledge Competitive Examination a pan lading'a inakigot jing diu tahsan le kinep'na pum'in, ahithei chan'a thanom tah le pontho tah a pan inalah cheh diuvn Pakai minin avelin temna le hetsahna ahung kinei kit in ahi. Convention Level Sunday School Competitive Exam hi kum masa ho bang'a houbung'a kon'a gambih, gambih'a kon'a Convention hitalouva, koi hile apang nom jousen pan alah/ apantheina ding'a anomchan dinga hon (open) ahitan, hiche'a ding'a chu Application Form kistem ahin, apang nom jousen dangka 100/- a Application Form akilah'a apply abol ding ahi. New Testament Scripture Knowledge Competitive Exam jong chutima chu ahi. Hiche Exam teni hi nikho khat'a First Session le Second Session (vai le sun) a kibol ding ahi. Application Form hi KBC Office'a Literature Secretary ahiloule Ms. Nenga Singson kom'a muthei hiding ahi. Office lang'a hung kilah ding boi sajep hon gambih pastor ho ihin nganse theiyu ahi. Apang ding jousen tu'a pat'a Application Form ikilah'uva August lha kichai kah a Literature Secretary kom'a submit ibol diu ahi.

Rev. Haoneo Haokip
Secretary
Literature & Publication, KBC

Pakaija ngailut KBC Houbung mithengte le Thuso simjouse damsel'a kumkim ihinpah theinau jal'in Pathen thangvahna sangtah ipehnauban ah kangailutnau Salam kahinpeuve. Tunichan'a KBC Education Board natoh machalna ho le maban a itoh diuva um thilgon ho noiha hin chomcha'n kahintah languve.

Machalna ho:-

Kumsih leh KBC Assembly/Council a anakisei jing Dr Colvin Academy chonding kiti chu 2018 kumbul in Houbung mite toh kinoptona dungjujin ana kichondoh in, hinlah amun man(Price)ding Rs 1.5 Cr pehding kiti chu Share hungkihom Houbung atamjo a kon mudinga lom akimuthei tah lou jeh in MoU hi achelha thei tapon, tuchan hin athu hi seichetna pen umlouvin akikoitai.

Achesa kum phabep langa Haolenphai gambek khat Mission-cum Education Centre dinga ina choh u chu tukum May sungin bou agamman aga kipelhingthei bep'in, Haosate thil hetthemna leh KBC angailutnao jal in KBC gam kituptah ahijingtheina din Lekha angaicha jouse akisutuptan ahi. Tua hi agang thei pen'a Fencing semdoh a chule asunga thil phachom tampi ibolpat theiju ahitai.

Tohgon thah ho:-

Kanggui College Building natoh ahung machal jingin, kum 2 sunga Room 7 ihin sahdo u chu tukum Mission Fellowship Nov.14, 2019 masanga chaithenga "Inaugrate" bolteiding tohgon akineijin, hiche tohgon ho sodohna dinga Houbung tin'a Share hung kihom chu Houbung 50 vel in ahinpelut theitan, achunguvah kipathu sangtah in kahinphonguve. Apeloulai hon jong lhani sung ngeija ahinpehlut chehna diuva mopohna eihinlah peh diuv in tohkhompi KBC Pastor jouse leh Houbung lamkai jouse kineppina lentah pumin kahintem uve.

Kanggui College new building tohban kitong jom kitta



Agamkaijin ngaichatna dol'a School thumna Petition ahinpeh uhi Meeting ho leh Consultation a jong akiseijin, kumthah(2020) a pat alhompen a 3 beh boipiding tin lunggel akineijin in ahi.

Shalom Theological Column

SERVANT LEADER WORKSHOP



Shalom Theological Seminary in organized ahin bol Kuki Baptist Convention toh gon na noi a achisa Nisim 5-7 June 2019 sung in Servant Leadership Workshop lolhing tah in ana kichai tan ahi. Hiche a hin KBC Pastor hole worker ho mi 27 in pan ana lan chule reaource person ding in Development Association International a kon Mr. Tegi le Mr. Raj Pradhan ahung pang lhon in ahi.

Worshop hi phase thum hiding ahin tuchunga hi anivei chan na ahung hitan ahi. Pathen phatsah ahi le 3rd phase Nov 4-6 kah a um ding chule mihil dinga Dr. JM Paopu jong hung pang ding ahi. Maban a taojing pum a aban nga ahi jing tan ahi.

Dr Colvin academy Moreh

Pathen lungset najal in Dr Colvin academy Moreh in kumseh a ana kiboljing bang in June 13 - 16 2019 sung hin Huhhing na camp, vocational children training school VCTS anakibol in ahi,



Camp orators YWAM teams
 Camp director
 Akeng ywamer,
 Controller: Dr Colvin academy
 Moreh.
 Camp viewers Colvin staffs.
 Camp worship team Gospel
 horn band.



Camp hi eipao sang in school language sappao akimang in hiche jong
 hin chapang ho ding phatchomna lentah apein ahi.

Camp lolhin thei na ding in Dr. Colvinians family jouse aboi lai jouse
 ana kipang in ahi,

Camp sung ah orators hoa kon in items chom chom simlai chapang
 ho ding semlai hinkho a chepithei ding tampi kihil najong akibol doh
 in ahi. Games, slide show chom chom Gospel music team ho jong
 ahung Pang uvin live worship jong akibol in ahi.

Camp lolhin napen

Chapang mi 200 Val camper ho lah a mi 170 simlai hinkho a Christa
 huhhing na loupitah aki muthei taovin pathen thangvah in umtachen.

KIPANATHU SEINA..

Moreh Baptist Church Houbung hon thil lo hihen lhunna gena hijong
 le abon in eipoh doh pih uvin amun Houbung te Chung ah KIPANA-
 THU seijoulou akiphong e.

YWAM teams ho um lou hileh hitobang chapang camp kibol ho hi lol-
 hing lou ding ahin amaho jeh a kilolhing ahijeh in KIPATHU seijoulou
 akiphong kit e.

Tuchung VCTS huhhingna camp

Lolhin theina dia kithopina hinpe jouse chung ah kipathu seijoulou
 akiphong e.

Dr Colvin academy Moreh school Staffs jousen NGAILUT na neitah a
 camp lhung a chapang ho avet suijeh uvin kipathu seijoulou kahin
 phong kit e.

Pathen in Dr Colvin academy Moreh phungvuh Jing taken.

Principal Dr. Colvin Academy, Moreh

Work Committee Tour

Achesa nisim 18th May, 2019 nikho hin Songjang Baptist Church KBC Gambih No. 6 mun a One Day Women Leadership Seminar Cum KBC Women Work Committee Tour ahungun, Gambih sunga akho akhoa minute mi 100 vel ahung kikhom doh in, Programme ho jouse lhandoh na Gambih Pastorpan eimanpeh un, mipi kaikhom na a Women Secretary nu in Pathen thua tilkhouna aneijin, kaikhom kikhen in Seminar Class akinei paijin, Class 1na Pi Hatneilam Haokip, Vice President in Topic: 'Jile cha chung a Nute mopohna' thua phatah in nute ahung kikhom jousen aphot chompi thei dingtah in tilkhouna aneijin, Class 2na in Topic: Lamkai Hina ti topic a Ng, Lhingjanem W/Secy KBC in paper present phatah in abol in, Gambih Pastor pale khonei H/Deacon pale pate mi phabep in jong achai chan geijin eumpiuvin, khonei ten Lamkai ho Anneh phatah in asem peh un, khonei tele ahung kikhom mipi te chung a kipana akiphongin, Pathen lungset in programme lolhing tah in akichaijin Pathen thangvah aume.

Pakaija natoh khompiu,

Nl. Lhingjahat

W/ Chairperson, No. 6

Nl. Lhingneikim

W/Secretary, No. 6

Gambih No 6 Nute Nikho



KBC No. 6 Nute Makai nanoiya, Centre church Tujangvaichong Houbung munna, NUTE NIKHO Kitetna jatchom chom bollin nomtah in Annkong soh pumin lhangsung Mipi in nomtah in ana mangtauve.

Gambih No. 17 Chapang Camp

Achesa nisim 12th - 14th June, 2019 sunghin Gambih No. 17 Women Department mopohna in C/C Chassad mun a Chapang Camp akibol in, Speaker in Miss Anem Haokip, Women Secretary, KBC le Evan, Chingboi Chongloi, Child Evangelist, KBC ahilhonin, Camp Director Miss Lelend leh Miss Hohoi



ahilhonin, Gambih sunga Houbung tin a konin Chapang 240 ahung kikhom doh in, Gambih Pastor pan Camp thensona aneijin, Camp khum khana C/C Pastorpan amangin, Pathen lungset in Camper hon Huhhingna thua kihet chetna aneijun, tumasanga anabol khel na hou kisih a nungbol kit talou dingin mi tamtah in Pakai anga kilhan doh na aneitheijun Pathen thangvah aume. Hiche Camp lolhin theina dinga lamchom chom a pan hinla ho, Speaker teni le Camp Director teni chule sumle pai, anchang le anme ding chule thilkeo lo keova pan hila ho Convention Nute le Gambih sunga Houbung ho jouse chule changval a kithopina hinpe ho jouse le Camp sunga neh le chah lam a eiboipi hou Houbung mite jouse chungle mipite chung a Gambih nute jouse thalhengin kipa thu Pakai minin kipa thu kahin phonguve.

Nl. Hoinu Vaiphei
W/ Chairperson, No. 17

Nl. Boicy Haokip
W/ Secretary, No.17

Khomunnom B/Church, KBC No 3 PATE NIKHO



Kum 2019 Pate nikho Khomunnom Baptist Church in Pathen phattheina chang pum in kipah tah in Pu Thonglen Chongloi M.Div Speaker hina in akimang in ahi.

Women Department le youth Department mopohna in sun in Pate kitet golseh leh adang dang akibol in nom tah in akimang in ahi.

Chief guest in Pi Veinem Hangshing, Guest of Honour in Pi Dom-nem Hangshing chule Pi Nengkhohoi Hangshing Functional President in eipanpeh uvin chuleh Special guest in minu 15 apang uvin Pate jouse ngailut na vetsah na in loupi tah in akimang chai tan ahi.

KBC Gambih No 15 PATE NIKHO

KBC Gambih No 15 hopsung a um Pate hon PATE NIKHO Chu Zion

veng a nomtah in ana kimang khom min ahi.



Heche nikho chun Rev. Thanglen Haokip Gambih Pastor in Thupi ngainom mtah ase in ahi. Chuleh Houbung jouse a Pate hon Pate lapi a kitet na anei u vin Chukit leh Bible kitet na jong aum min Pate khutthem kitet na jong aum my n anom lseh e.

Pathen in Gambih phatthei boh jing tachen.

Nute Camp S. Khudengthabi B/Church KBC No. 15



Pathen lungset in nisim 20th - 24th, 2019 sunghin S. Khudengthabi Baptist Church, KBC No. 15 in Nute Camp kaneijun, Thupi 'Nanun nakha-

nu nakhosah danu chu Christa kipana thupah toh kitoh pou pou hen' Phil 1:27 ahin, Speaker; Ng. Anem Haokip, Women Secretary, KBC le Pi Hatneilam Haokip, Vice President W/Dept, KBC ahilhonin, Camper mi 52 ahin, Pathen panpina jallin lolhing tah in akichai theijin Pathen thangvah aume. Camp sunga lamchom chom a pan eilah peh hou ahi-deh a Speaker teni chule Houbung sunga pate jouse ahin, Haosapu le Houbung sum tongkha lou hel a kipeh na hin neiho sumle pai, anchang, meding chule thil le lo dang danga pan eilah peh hou jouse chungga jong kipa thu kahin sei uve. Pathen phat thei eiboh chhhheh tao hen.

Pi Reenu Haokip, Chairperson, SK Thabi No. 15

Youth Camp 2019.

June lhasunghi chate Summer Vacation ahiji. Tukum injong chate hon Pathen thua kitilkhouna aneithe nading uvin achesa nisim 20-



23rd June sung chun KBC Gambih No 13 in Tujang Baptist Church mu-nah Gambih Youth Camp anakibol in ahi. Hiche Camp a chun Gambih sung Nungah Gollhang

150 in pan ahung lan ahi. Camp Speaker in Rev Henjalen Doungel Mission Secretary apang in chuleh Camp Director in Pastor Khupjoyfull Singson Gambih Pastor apang in ahi.

Hiche Youth Camp hi Gambih Women Dept. sponsor na noiija kibola ahin muntin houbung mite taona jallin lolhing tah in anakichai jin a hi. Lolhin na eipeova Pa Pathen thangvah in umhen.

CONDOLANCE



Ngailut leh it umtah Late pu L.Yampu Baite in eina mol lemsan nao chungah Chritistian Education Board in lung hempina thu kahin phonguve.

Amahi 2017 a pat Edn board member khat hina a kahintoh khom pan u ahi. Kum 3 sunga kahin toh khomnau ahin ama mi hina kicheh tah kihedoh thei chu,

- 1. Meeting le chedoh khomna ding prog. ho a hi aphot cha'a ki-mangcha jing ahin, kihilna theitah mi ahi.*
- 2. Education ngailutah mi ahin, Edn. System semphat na ding thu kiseina chan ah contribution hoitah tah eipejiuvn ahi.*
- 3. Neh le don, sum manchahna lam a chingthei tah a hin kho mangthem mi khat ahi.*

Adang tampi umjong leh hichan iseidoh nau chungah ngailut na vetsahna in Edn. board in jong Saipi khup in along tomna akinei-jin, Pathen in adalhah a insung mite lungmonna leh tohga sona hinkho'n mapuijing tauhen.



*Rev Onthang Haokip
Secy. Christian Edn board, KBC*



2012 jouva kila Pastor ho Serventhood leadership
Training, Trinity Kolrengel 4th-6th June sung In Shalom
Theological Seminary mopoh na in ana kibol in lolhing tah in akichai tai.



Chapang Camp, Centre Church Chassad
KBC Gambih No 17, 12 to 14 June 2019



Paolunlal Weds Veineinem
Pathen gopsa chi themin suken hih he

Children Ministry Director Paolunlal leh Ng. Veineinem
Nisim 31st May 2019 nikhon T. Vaichong Centre Church
mun ah Pathen Houdan theng in kichenna ana neilhon tai.

Post Regd. MNP/81
Regd No. 18134/88



*Mun
chomchom a
PATE NIKHO
kimanna*

If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173

